



04.11.2021

UKA2021/74

**Inatsisartut isummerfigisassaattut siunnersuut Naalackersuisut peqquneqassasut meeqqat atuariannut tulluussakkamik inuit pisinnaatitaaffii pillugit atuartitsissutissanik kalaallisut ataqatigiissumik sananissamik aammalu taassuma saniatigut suliniutigineqassasoq, meeqqat atuarianni atuartitsisut inuit pisinnaatitaaffii pillugit ilinniartitsinissamut pikkorissarneqassasut (Inatsisartunut ilaasortaq Nivi Olsen, Demokraatit)**

Siunnersuuteqartumut qujalluta, siumumiit siunnersuut imatut oqaaseqarfignissavarput.

Inuit pisinnaatitaaffii tamatsinnut ulluinnatsinnut sunniisinnaasorujussuupput. Pisortat ingerlataanni qanoq sullissineranut sullissilluarnissaanullu aamma nalilersutaasinnaammata.

Inuit pisinnaatitaaffiinit, siunnersuisoqatiginnit minnerunngitsumillu illersuisunik pilersitsinerup kingunerisarpaat nalunaarusiat arlalippassuit suliarineqartarmata. Ajunnginnerpaamik ingerlatsisoqaraluarpat qularnanngilaq nalunaarusiat isornartorsiutaat annikinnerussagaluartut kisianni taamaattoqanngilaq.

Nunatsinni inuit pisinnaatitaaffii pillugit, meeqqaniit utoqqarnut eqqartorneqartarneri nutaarsiassaangikkaluarluni nalunaarusianik tunngavilersorluakkanik samminnitarneq suli nutaraavoq. Uanga inersimasunngoreeraluarlunga suli qulequttamut pineqartumut akunnattoorsinnaasarpunga, qularnanngilaq kisima taamak misigineq ajorlunga.

Taamaattumik inuit pisinnaatitaaffii pillugit meeraanermit sammineqartalernissaat Siumumiit taparserparput. Meeqqat inuusuttullu siusissukkut pisinnaatitaaffitsik pillugu samminesaqartalernerisa kingunerisinnaavaa inersimasunngoraluttuinnarnermi ilimallualereersimassagaat qanoq ilinikkut eqqunngitsumik pineqarsinnaanerlutik illuatungaaniillu aamma qaqugukkut eqqortumik iliorfigineqarnerlutik.

Taamatut oqaaseqarluta siunnersuut siumumiit ataatsimiisitaliamut susasaqartumut ingerlateqqipparput.

Hans Peter Poulsen, Siumut